

**Og Sulat ni Paul dia sog  
Poktanudanan ditu' sog  
Pilipus**

**Og Piuna Talu' pa'ali sog  
Sulatni Paul dia sog  
Poktanudanan ditu' sog  
Pilipus**

Og sulat ni Paul koni, posungu' ditu' sog poktanudanan dia ni Isukristu nog ditu' sog Pilipus. Ombasta pa'ali sog kangoy non ditu' sog Pilipus dia sog libru nog Piginang nog Sosugu'onanan ni Isukristu 16:1-40. Og kosulat non nog sulat koni, mitang ion ditu' sog kolobusuan. Bu sog tang koyon, misasow ion sabap sog kosusi dianon nog duma polomalianan. Bu misusa dosop ion sabap sog polopanadanan kitu' nog di' motud nog minampu' dia sog poktanudanan ditu'. Tibua, minsan si'oy ma' nitu', sinulat non og sulat non koni bianan dia sog da'da'an sabap sog kopagon nog tud non bu kopongandol non dia ni Isukristu.

Og soginis nog potugyuan nog sulat koni, og posolamat ni Paul dianilan ditu' sog Pilipus po' pinoit nilan og tabang nilan dianon sog tang nog kulang kotubu'an non. Pigopasan non mokpotantu dianilan bagun ilan da moksibolu' bu ompagon minsan si'oy kibianbianan nilan og ompihit. Mingoningoni dosop ion dianilan nog

pokpobaba' nilan og bolotabat nilan nog mama' nog kopokpobaba' ni Isus. Bu di' ilan pogboya'an nog kopogabak bu og kopokpotaspotas. Pipikil non dosop dianilan, nog og kotubu' nilan koyon nog kosolabuk nilan dia ni Kristu, og tulung nog Mikpongon dianilan nog mitabuk nilan bianan dia sog kopongandol nilan, kona' bianan dia sog kopokokunut nilan dia sog Botad nog bansa Hudyu. Sinulat non dosop pa'ali sog da'da'an bu og kotikna' nog pikilan nog bogoyon nog Mikpongon dia sog ain lumangka nog kosolabuk nilan dia ni Kristu.

1. Og bokna nog surat koni, 1:1-11.
2. Og dili kibianbianan ni Paul, 1:12-26.
3. Og kotubu' nog ain sinumolabuk dia ni Kristu, 1:27-2:18.
4. Og pikilan ni Paul pa'ali dia ni Timuti ilan ni Epaproditus, 2:19-30.
5. Og pidonsama' tumalu' pa'ali dia sog bantaanan bu sog ain kondokondok, 3:1-4:9.
6. Og dongya' ni Paul dia sog poktanudanan ditu' sog Pilipus, 4:10-20.
7. Og doksu'an nog surat koni, 4:21-23.

<sup>1</sup> Akon si Paul bu si Timuti, og mikpoit nog surat koni. Ami og sosoligan ni Kristu Isus.

Og surat koni posungu' dia sog glam nog pigotowan nog Mikpongon sog koliwagan bonua nog Pilipus, ain sinumolabuk na dia ni Kristu Isus bu asta sog polongokbit sog poktanudanan bu sog sosoliganan nilan.

<sup>2</sup> Og tulung bu kotikna' nog pomikilan mongon daniu tidu sog Gama' ta nog Mikpongon bu sog Kounutan ta nog si Isukristu.

*Og posolamat bu gyakin ni Paul*

<sup>3</sup> Giap nog ompikil u amu, mokposolamat u dia sog Mikpongon. <sup>4</sup> Bu giap nog pogyakinan ku og glam niu, mogyakin u kobon non dunut og da'da'an ku <sup>5</sup> po' tidu sog kotabuk niu nog Gomba'is nog Guksugan koni bu asta sog numun kitu', kobon non tinumabang amu dianakon sog kopokpulonag u dun. <sup>6</sup> Bu kosunan ku nog, og Mikpongon nog ion miktolipun nog gomba'is nog ginang koyon daniu, numun kitu' sanan non pa mogdoku' dun asta matong og gondow kitu' nog kopokpuli' ni Kristu Isus dini.

<sup>7</sup> Dadi, do'itan doda' nog ma' nini og pikilan ku pa'ali sog glam niu po' landu' og glolaman ku daniu. Po' og tulung nog Mikpongon dianakon misunu' amu dosop dun, minsan si'oy ma' nini og kibotangbotangan ku koni dini sog kolobusuan otawaka sog kopogustal u nog Gomba'is nog Guksugan koni, bu sog koponaksi' u nog motud dia sog ain momungyas. <sup>8</sup> Og Mikpongon og mokotaksi' bog andun kosolag og gindowan ku daniu po' og glolaman ku daniu inilingan ku og glolaman ni Kristu Isus daniu.

<sup>9</sup> Dadi, pongoningonion ku dia sog Mikpongon nog kobon non pododungag og glolat niu bagun dumalan og sabut niu bu og kotoan niu momikil bog olo og motud <sup>10</sup> bagun niu da ompili' ain molongas sog glam non, nog bagun da mimung nog molonu' og pikilan niu bu da' sila'on daniu

sog matong gondow kitu' nog kopokpuli' ni Kristu dini sog glupa'an. <sup>11</sup> Bu mimung dosop nog modulus og polomotadon niu nog miktidu dia ni Isukristu bagun kosonglitan og Mikpongon dun dunut ombantug og koba'is non.

### *Og kibotangbotangan ni Paul*

<sup>12</sup> Pigilugan, og kolegan ku dun nog mosabut niu, nog sabap sog kibianbianan ku koni nog ompihit, angkin tanan kopulonag og Gomba'is nog Guksugan koni. <sup>13</sup> Po' og doksu'an non, kona' tibua og glam nog sundaluanan koni dini sog pigonongan nog datu' koni og mokosabut dun nog sa'an mikolobusu u po' sabap nog akon og sosoligan u ni Kristu. Suga'id non, asta dosop og glam nog gotowanan dini og mokosabut dun. <sup>14</sup> Bu sabap sog kopokolobusu u koni, og kodokolan nog pigilugan ta sog tanud dini, migdungag ilan kopagon dia sog Kounutan ta nog boya'an pododungag kokosog nilan mogustal nog talu' nog Mikpongon.

<sup>15</sup> Tibua, motud da nog ongon miksibok bu migdalug sabap dianakon, boya'an ginotadan nilan mogustal pa'ali dia ni Kristu. Tibua minsan ma' nitu', ongon dosop mogustal pa'ali dia ni Kristu po' omba'is og pomikilan nilan. <sup>16</sup> Po' sabap sog glolat nilan. Po' kisunan nilan nog sa'an dini u sog kolobusuan koni po' tumaksi' u nog motud doda' og Gomba'is nog Guksugan koni pa'ali dia ni Kristu dia sog ain momungyas. <sup>17</sup> Tibua, ain og mikpoksibok kitu', migustal ilan pa'ali dia ni Kristu po' og pogopasan nilan bagun da ilan dili og ompotas.

Og pogopason nilan kona' og mokpotintu po' balu' nilan dun, mogdungag sinsaan ku koni dini sog kolobusuan. <sup>18</sup> Tibua, minsan olo glegan nilan omba'is otawaka molaton, da' da balan ku dun. Suga'id non, og bololaga', sumboy doda' ompulonag og gustalan pa'ali dia ni Kristu. Dadi, sa'an itu', migda'da' u dun.

Migda'da' u dosop kobon non <sup>19</sup> po' kosunan ku nog sabap sog gyakin niu bu bianan sog tabang nog Bolakat ni Isukristu, og doksu'an nog kibotangbotangan ku koni mimung posungu' u mokoluas dun. <sup>20</sup> Po' og glegan ku bu dodomaan ku nog minsan olo matong dianakon, minsan patoy potubu'on nilan akon, ondi' u da kosipogan dun, suga'id non, ompagon da og pikilan ku po' bagun da si Kristu kosonglitan sabap dianakon kobon non labi na numun koni. <sup>21</sup> Po' akon, og tibuk nog kotubu' u sog glupa'an koni, dia na ni Kristu, bu og guntung u bila matoy u. <sup>22</sup> Tibua, solian ku pa dini sog glupa'an, ngon pa og gomba'is inangon ku. Dadi, di' u moto momili' dun. <sup>23</sup> Ma' nog piksangit guangoy. Po' og glegan ku bosia, mokawa' u na dini po' bagun dia u na ni Kristu po' ma' nitu' bosia og molongas sog glam non. <sup>24</sup> Tibua sabap daniu, golom na nog di' u pa sokali' owa'on dini sog dunya koni. <sup>25</sup> Dadi, sa'an itu' misabut u na, bu kosunan ku dosop nog ondi' u pa sokali' owa'on dini bu mogonong u pa dini niu bagun pododungag og kopongandol niu dia ni Kristu bu dunut da'da'an niu dosop dun. <sup>26</sup> Po' bianan sog dion u niu, mimung mogda'da' amu tokodoy dia sog kosolabuk niu dia ni Kristu Isus.

<sup>27</sup> Tibua, minsan olo kobianbianan ku, sumboy og polomotadon niu duma'it tokodoy sog Gomba'is nog Guksugan pa'ali dia ni Kristu. Bila ma' nitu', mokangoy u dion otawaka ondi', modongog u da pa'ali daniu nog ompagon amu sog kopoksolabuk nog pikilan niu bu miksolabuk amu sog tabal niu dia sog ain sumusi kitu' nog tanud ta koni nog bianan sog Gomba'is nog Guksugan. <sup>28</sup> Na' amu tokodoy mondok dianilan sog ain sumusi koyon daniu. Po' bianan sog ginangon niu kitu', mimung amu nog tanda' nog ilan koyon posungu' na mogla'at nog polihala' nog Mikpongon. Tibua amu, tobangan amu da nog Mikpongon. <sup>29</sup> Po', binogayan amu nog kopatut tumabuk dianon bu kona' tibua nitu', suga'id non, binogoy dosop nog unungan niu ion dia sog sinsaan sabap sog kopongandol niu dianon. <sup>30</sup> Dadi og ma'ana non, sabap sog ma' nini koni, amu bu akon miksolabuk ita nog kibianbianan ta koni nog sinsaan sabap sog Gomba'is nog Guksugan pa'ali dia ni Kristu. Mitongow niu da og glogon ku kitu' dini kitu'. Bu ma' da nitu' nog midongog niu koyon asta pa sog numun koni.

## 2

### *Og kobaba' nog bolotabat ni Kristu*

<sup>1</sup> Dadi pigilugan, bianan sog kosolabuk niu dia ni Kristu, kipondolo'isogan amu, bu sabap sog glolat non, kipongomu'an amu. Bu miksolabuk amu dosop sog Bolakat nog Mikpongon, bu molilolatoy amu bu molalam amu sog pakasi niu.

<sup>2</sup> Dadi, poksolabuk amu tokodoy sog glolat niu,

bu sog pikilan, bu sog tugyu niu. Bila ma' nitu' amu, og da'da'an ku dun di' kolobian. <sup>3</sup> Sumboy di' amu mogapas moginang nog bagun da dili amu ompotas dun. Bu na' amu dosop mogbonsagbonsag otawaka mokpotaspotas. Suga'id non, bianan sog kopokpobaba' niu sog duma niu, pikil niu ilan nog labi ilan pa daniu. <sup>4</sup> Bu konia konia daniu, sumboy moksinungodoy amu. Kona' tibua og dili og glegan niu og poksungodon niu.

<sup>5</sup> Og ma'ana non, og pikilan niu sumboy dumalan sog pikilan ni Kristu Isus.

<sup>6</sup> Po' si Kristu, og gasal nog Mikpongon. Tibua, minsan si'oy ma' nitu' ion, da' da ion pongimakat nog mokobatuk ion dia sog Mikpongon. <sup>7</sup> Bu da' non longkaoy og gasal non nog kinodiwata. Suga'id non, linangka non og glangka nog sosoligan, bianan sog kobata' dianon nog miimung ion ma' nog gotow sog kilawan. <sup>8</sup> Bu dangan miimung ion nog gotow, mikpobaba' ion bu inunut non og glegan dianon minsan si'oy asta sog minatoy ion sog kudas. <sup>9</sup> Dadi sa'an da og Mikpongon, piotas non ion nog boya'an da'idun mokolabi dianon. Bu iningolanan ion nog ngalan nog ondi' kolobian <sup>10</sup> po' bagun bila modongog og ngalan ni Isus koyon, tomuyon ion nododa' nog glam nog gotowanan, ain og dini sog pigloban nog glangit bu glupa'an, bu asta pa sog silung nog glupa'an po' glam non monginglu'ud dianon. <sup>11</sup> Bu glam nog gotowanan mokpoktalu' nog si Isukristu doda' og Pogbaya' sog glam non,

dunut mimung nog kosonglitan og Gama'  
ta nog ion og Mikpongon.

*Og polomotadon nilan pa'ali dia sog tud nilan*

<sup>12</sup> Dadi, amu og glokoleanan ku nog bololaga' dianakon, ma' nini. Mikokunut amu doda' da dianakon kobon ku kitu' dion. Tibua, labi amu na pokokunut dianakon minsan si'oy da' u dion niu numun koni. Bianan sog gondok niu sog Mikpongon, kobon non pogopasoy niu minang ain og dumalan kitu' dia sog kogawon non daniu tidu sog baya' nog dusa bagun itu' kotoktuban.

<sup>13</sup> Po' og Mikpongon, kobon non mogbogoy daniu nog glegan niu moginang bagun niu da minang ain kosu'atan ion dun.

<sup>14</sup> Dadi, inang niu og glam nog ginang niu nog da'idun susian otawaka og gyawab niu <sup>15</sup> bagun amu mimung modulus bu molonu' nog piglogombata'anan nog Mikpongon. Po' di' amu mama' nog duma gotowanan dini sog dunya nog mokolaton tokodoy og kohinangan nilan bu pikilan nilan. Suga'id non, domikian da mama' amu nog bitunanan sog glangit nog sumilow <sup>16</sup> kobon niu mokpolatas dianilan nog talu' pa'ali sog kotubu' nog da' kopus non. Sa'an itu', omba'is tokodoy og pikilan ku bila matong og gondow kitu' nog kopokpuli' ni Kristu dini po' da' da kobolong gulas sinsala' u sog kopoginang u koni. <sup>17</sup> Tibua, bila gomonsunoy og posungu'an ku bunu'on nilan na akon, mimung u domikian mama' nog singkot sog pomalas niu dia sog Mikpongon bianan sog ginang niu bu kopongandol niu dianon. Bu mogda'da' u dun bu



dumuma u sog gloliag niu sog kibianbisanan niu.  
<sup>18</sup> Dadi amu si'oy, sumboy mogda'da' amu dosop  
 dun dianakon bu dumuma amu dosop mogloliag  
 dianakon.

*Pa'ali dia ni Timuti bu si Epaproditus*

<sup>19</sup> Dadi, sog baya' nog Kounutan ta, di' da  
 pulilung, dondagon ku da si Timuti mangoy dion  
 niu po' bagun ku motikul bog olo bayu'bayu'  
 niu dion, bu bagun u dosop kopondolo'isogan  
 nog dongogan pa'ali daniu. <sup>20</sup> Sa'an si Timuti  
 og dondagon ku mangoy dion niu po' dini,  
 ion da og sumolabuk dianakon sog pikilan ku  
 nog pa'ali sog kopianan niu. <sup>21</sup> Po' og duma  
 gotowanan dini pododion nilan og dili kopianan  
 nilan, kona' og pododion nilan ain kopianan kitu'  
 pa'ali dia ni Isukristu. <sup>22</sup> Tibua, kosunan niu  
 da si Timuti bog olo og kopoktantu non. Po'  
 miimung ion mama' nog bata' u. Linumbidan  
 non akon dia sog ginang u koni nog pa'ali sog  
 Gomba'is nog Guksugan. <sup>23</sup> Dadi, og dodomaan  
 ku dun nog modondag u ion mangoy dion niu  
 ampun kosunan ku bog olo og posungu' matong  
 dianakon. <sup>24</sup> Bu dodomaan ku dun sog Kounutan  
 ta, nog di' da pulilung mokangoy u da dion niu  
 og dili glawas u.

<sup>25</sup> Bu si Epaproditus dosop, ion og sinugu' niu  
 mangoy tumabang dianakon, og gilug u doda'  
 ion sog tanud bu dinumuma ion dianakon sog  
 ginang koni nog mogustal. Bu linumbidan non  
 dosop akon sog ain sumusi kitu' dia sog pomali  
 nami. Tibua, numun koni og pikilan ku dun,

sumboy nododa' muli' na ion dion niu <sup>26</sup> po' gin-dowon non tokodoy amu dion bu misusa dosop ion po' og dongogan non dion niu mikobian dow ion di' mokodag. <sup>27</sup> Motud doda' ion. Mikobian doda' ion nog di' mokodag nog boya'an guyudan buk dona og kotubu' non dun. Tibua, linolatan da ion nog Mikpongon. Kona' tibua non og linolatan non. Akon si'oy bagun u da ondi' ilakad kosusa dianon. <sup>28</sup> Dadi, sa'an lamig u na ion dinondag muli' bagun amu da moktongow puli' po' bagun amu da mogda'da' dun. Bu akon si'oy, mimung dosop nog ombogan og pikilan ku dun. <sup>29</sup> Dadi, pogdodial niu ion dunut og gloliag niu po' solabuk amu non dia sog Kounutan ta. Bu sumboy mogadab amu dosop sog gotowanan nog mama' non <sup>30</sup> po' ion guyudan buk dona matoy na bosia sabap sog kopoginang non nog ginang nog binogoy ni Kristu dianon. Po' inatas non sumoliu daniu tumabang dianakon.

### 3

#### *Og motud nog kodulusan*

<sup>1</sup> Sog gimpusan nog poktolu'on ku koni, pigilugan, pogloliag amu dia sog kosolabuk niu dia sog Kounutan ta!

Di' u mogbungas moguli'uli' sumulat daniu nog ma' nini po' mimung ini nog ponanggan niu.

<sup>2</sup> Pokpotubud amu nog gotowanan koyon nog momali nog sumboy moktuk og gotow mangka si'oy ion tolima'oy nog Mikpongon. Iningolanan ku ilan nog gayam po' og kohinangan nilan

koyon di' dumalan dia sog glegan nog Mikpongon. Ilan, lamig nilan tanan pongongolan og glawasanan nilan.\* <sup>3</sup> Kona' ilan nog pigotowan nog Mikpongon, suga'id non, ita og pigotowan nog Mikpongon. Po' ita og tinuk nog motud nog kopoktuk. Ita og miktamuy dia sog Mikpongon bianan sog Bolakat non, bu mokpoglolliag ita dia sog kotubu' ta nog miktidu sog kosolabuk ta dia ni Kristu Isus. Bu ondi' ita pia sumalig sog botad nog ma' nog piginang nilan koyon nog sagya ilan tibua mokpopotongow. <sup>4</sup> Po' somo' og kotolima' nog Mikpongon dianita sabap da sog polomotadon ta, motolima' non tokodoy akon. Po' da'idun mokantu dianakon sog polomotadon ku dia sog kopokokunut u nog botad nog bansa Hudyu. <sup>5</sup> Po' pitu gobi u tidu bota'on tinuk u na. Bu og pihak u nog Hudyu. Bu og pangkat u ni Apu' Israel bianan dia ni Apu' Benjamin. Bu pa'ali dia sog polomotadon sog tanud nog Hudyu, miunut u tokodoy po' og parasiu u tanan. <sup>6</sup> Bu sabap sog kopogastol u sog tanud u kitu' bakas, pimosokitan ku tanan ain poktanudanan dia ni Kristu. Bu pa'ali sop sog kodilis nog kopokokunut u nog polomotadon nog Hudyu, miunut u itu' tokodoy bu da' u tanan sila'oy dun. <sup>7</sup> Minsan si'oy kolongasan u nog glam nog ma' nion koyon, numun koni initung u na nog da' doksu' non po' sabap sog kolongas ni Kristu dianakon. <sup>8</sup> Bu kona' tibua nitu', og kosolag non minsan olo sog kilawan koni initung u na nog da' doksu' non po' sabap nog landu' kobololaga' og kokosun

---

\* **3:2** 3:2 Og pigolong non koni og kopogapas nilan sog botad nog moksunat.

ku dia ni Kristu Isus nog ion og Kounutan ku. Sabap ditu', binolong u na glam non bu og piitungan ku dianilan ma' na nog kolomu'lomu' bagun ami moksolabuk ni Kristu bu di' ami na moksuo<sup>9</sup> boya'an nog modulus u dianon. Og kodulus u numun koni kona' na og sagya pigimungimung nog bianan sog kopokokunut u nog Botad kitu' nog miktidu dia ni Muses kobon nitu'. Suga'id non, og kodulus u dia na miktidu sog Mikpongon bianan sog kopongandol u dia ni Kristu. Po' midulus ita dia sog Mikpongon bianan sog kopongandol ta dianon. <sup>10</sup> Moleg u tokodoy mokosun dia ni Kristu bu moleg u dosop nog minang dianakon og tunung nog kopotubu' dianon tidu sog patoy. Moleg u dosop sumolabuk dia sog sinsaan non bagun u mimung mama' non bianan sog kopatoy non. <sup>11</sup> Bu gomonsunoy bianan ditu' og glawas u koni potobu'on da puli' tidu sog patoy.

### *Og pogopasan dumopot nog polotanud*

<sup>12</sup> Di' u moktalu' nog mialap u na og glam non koyon otawaka mihurup u na. Suga'id non, monamal u kobon non bagun ku malap og kolegan non kitu' dianakon nog dopoton ku.

<sup>13</sup> Pigilugan, da' u da pokpikil dun nog mialap u na itu', suga'id non, solabuk da og ginangon ku ma' nini. Tolikudan ku na ain og minian na kitu' mangka u pogopasoy ain sog gunan kitu' nog <sup>14</sup> pogdopoton bagun ku da malap og sinimpan nog Mikpongon kitu' ditu' non sog glangit nog sa'an inonggat non akon bianan dia ni Kristu Isus.

<sup>15</sup> Dadi, ain og ompagon na og kopongandol non, sumboy ma' nitu' dosop og pomikilon non. Tibua, bila ngon og duma niu dion nog di' ma' nitu' og pikilan non, og Mikpongon da og mokpotampal dun dianon og glopangan non koyon. <sup>16</sup> Bu sumboy, unuton ta ain og goktob nog misabut ta.

<sup>17</sup> Pigilugan, duma amu moglogiling sog duma gotowanan kitu' nog miglogiling dia sog polomotadon ku otawaka sog ain og mikokunut sog polomotadon kitu' nog pianad nami dianiu. <sup>18</sup> Po' tatap u na bosia tolu'on dianiu bu puli'an ku nosop tumalu' numun kitu' dianiu nog dunut pongingloyu'an u tanan dun. Po' modakol og dumaanan ta, minanta ilan dia ni Kristu po' og polomotadon nilan ondi' dumalan sog polomotadon kitu' nog pinotayan ni Kristu sog kudus. <sup>19</sup> Dadi, og posungu'an nilan dia sog gla'at po' mindiwata ilan sog dili glegan nog glawas nilan bu kopogbonsag nilan nog kohinangan nog kosipogsipog. Og pomikilan nilan tinigbung nilan dini sog sagya sog kinilawan. <sup>20</sup> Tibua ita, og gotow ita sog bonua kitu' ditu' sog glangit, bu migda'da' ita kobon ta mogbagad dia sog Polonabang ta kitu' nog posungu' matong nog ion non ion og Kounutan ta nog si Isukristu. <sup>21</sup> Bu bianan sog dasig nog baya' non nog boya'an og glam non kopogboya'an non, og glawas ta koni nog moluya bu posungu' matoy, potimoluyon non mama' nog kolongas nog glawas non.

## 4

<sup>1</sup> Dadi pigilugan, bila ma' nitu' og dodomaan ta,

sumboy potintuon niu og kopokpopagon niu nog tud niu dia sog Kounutan ta. Amu og kololaman ku nog glokoleanan ku! Gindowon ku amu bu landu' gloliag u sabap daniu! Landu' koba'is og pikilan ku daniu!

*Og gimpusan nog pomali non dianilan*

<sup>2</sup> Pongonion ku dia ni Eudia ilan ni Sintiki nog sumboy moksulut ilan po' solabuk ilan da sog Kounutan ta. <sup>3</sup> Bu ika le, og duma u sog ginang koni, kosoligan ku ika. Tobangoy nika pa ilan. Po' ilan koyon, motugos ilan dumuma dianakon, dia ni Klement, bu asta sog glam nilan nog tinumabang dianakon mokpulonag nog Gomba'is nog Guksugan pa'ali dia ni Kristu. Po' ilan koyon, kilolaan nilan na nog Mikpongon po' og ngalananan nilan sinunu' non na dia sog ain binogayan nog kotubu' nog da' kopus non.

<sup>4</sup> Kobon non pogda'da' amu sog kosolabuk niu dia sog Kounutan ta. Bu puli'an ku pa tumalu' daniu, pogda'da' amu! <sup>5</sup> Bu sumboy potompalon niu og kopokpoluluk niu sog glam nog gotow po' mosompol na og kopokpuli' nog Kounutan ta. <sup>6</sup> Na' amu tokodoy dolohiton nog minsan olo og kobotangbotangan niu. Suga'id non, sog glam non pogyakin amu dia sog Mikpongon bu pongoningoni amu dianon sog ain kulang niu dunut og pokposolamat niu dianon <sup>7</sup> nog boya'an og kotikna' nog miktidu dia sog Mikpongon nog di' motokadtokad sobutoy, og mokpopagon nog dialom pikilan bu og pusung niu dia sog kosolabuk niu dia ni Kristu Isus.

<sup>8</sup> Dadi pigilugan, sog gimpusan, ma' nini. Pomikil niu ain og motud kitu', bu ain og molongas kitu' nog polomotadon bu modulus dia sog Mikpongon, bu ain og mokososu'at kitu', bu ain dosop og kopogdongya'an kitu'. Dadi, og glam nog ma' nion koyon, sumboy pomikilon niu. <sup>9</sup> Bu langka niu ain mitabuk niu bu mianad niu kitu' dianakon, otawaka ain og mitongow niu dia sog glangkalangka u, otawaka ain og ponolu'on ku nog midongog niu boya'an og Mikpongon nog ion mogbogoy nog kotikna' nog pomikilan, mongon daniu.

### *Pisolomatan ni Paul og binogoy nilan*

<sup>10</sup> Dadi, migda'da' u tokodoy dia sog Kounutan ta po' pitongow niu nosop dianakon nog molongas kobalan niu dianakon. Kosunan ku nog kobon non dia u sog pikilan niu. Tibua, ugat niu pa kopotongow puli' dianakon po' da'idun og tang niu mokpotongow dun. <sup>11</sup> Bu kona' ini nog tinalu' u daniu po' kionda'an u. Po' minsan olo og kibotangbotangan ku, di' u mosusa dun. <sup>12</sup> Po' sibon u da konda'an otawaka kongonan. Bu miatuk u na bog olo og bianan dun nog bagun u di' mosusa minsan olo tangoy dun, bila sog timpu kobus otawaka sog tang nog daya, bu bila sop sog tang nog mibosug u otawaka sog tang nog kigutoman u. <sup>13</sup> Po' mokoga'us u da nog minsan olo kobianbianan ku bianan sog dasig nog binogoy ni Kristu dianakon.

<sup>14</sup> Tibua minsan ma' nitu', molongas tokodoy nog dinumaan niu akon sog glogon ku. <sup>15</sup> Bu kona' tibua nitu', po' kosunan niu da nog dangan

ginumonat u tidu sog bonua nog Masadonia, sog tagna' u mokpulonag nog Gomba'is nog Guksugan, da'idun og tinumabang dianakon nog pigilugan ta sog tanud ual da amu. Minsan kiongonan u otawaka kikulangan u, amu da og dinumuma dianakon. <sup>16</sup> Po' dangan kilogonan u kobon ku pa ditu' sog koliwagan bonua nog Tesalonika, kona' tibua nog insan amu pokpoit nog tabang niu dianakon. <sup>17</sup> Kona' po' mongoni u nog tabang, suga'id non, og kolegan ku dun mogdungag tanan og popia nog Mikpongon dianiu. <sup>18</sup> Bu mitabuk u da og glam nog pinoit niu kitu' dianakon bu miksawadsawad tanan. Dadi, kitoktuban na og glam nog kulang u kitu' dangan mitabuk u dia ni Epaproditus og bogoy niu koni dianakon. Bu og bogoy niu koni miimung nog bogoy bu pomalas dia sog Mikpongon nog momut bu kisu'atan ion tokodoy dun. <sup>19</sup> Dadi, og Mikpongon og mongoktub nog glam nog kulang kobus niu bianan dia ni Kristu Isus po' og daya non ondi' kolobian. <sup>20</sup> Dadi, og Mikpongon nog ion og Gama' ta, poksonglitan ion asta sog da' kopus non. Amen.

### *Og sogina ni Paul dianilan*

<sup>21</sup> Koni og sogina u sog glam nog ain sinumolabuk na dia ni Kristu Isus, og pigotowan nog Mikpongon. Bu og дума pigilugan ta sog tanud nog ain dini nakon, minogina ilan dosop dianiu. <sup>22</sup> Glam nog pigotowan nog Mikpongon dini bu labi na og gla'ayatanan ni Datu' Sisar, minogina ilan dosop dianiu.



<sup>23</sup> Dadi pigilugan, og tulung nog Kounutan ta  
nog si Isukristu mongon dia sog glam niu.

**Kitab Bogu Pasad talu' nog Mikpongon  
Subanon, Western: Kitab Bogu Pasad talu' nog  
Mikpongon New Testament**

copyright © 1996 Wycliffe Bible Translators, Inc.

Language: Subanon, Western

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 7 Nov 2023 from source files  
dated 29 Jan 2022

04701be4-22cc-51ef-baf5-706018256e87